




Moderamen
GBKP



Ibadah Keluarga

Kamis, 30 Juli 2020



Moderamen_GBKP



gbkp.or.id



Moderamen GBKP

1. Persikapan

- ☒ Ertoto secara pribadi
- ☒ Ngaturken si muat bagin i bas kebaktin, rende, ngoge Pustaka Si Badia ras renungen, pertoton syafaat

2. Rende KEE 194:1,3

Senang Adi Ras Yesus

1. Senang adi ras Yesus. Malem ate ta pe Si dahi lah Penebus. Je dat kita dame e Begiken pendiloNa. Marilah kam kerina Si latih bas geluhta. Maka kam senang ka
3. Mari si dahi Yesus. Berkatlah ras ku je Ukurta tetap njulus. Ndahi kesenangan e Enggo me isikapken. Banta kap ingan e Je ingan si muliana. Otalah ras ku je

3. Ertoto Guna Renungen

4. Ngoge Renungen

- ☒ Ngoge Jakob 1:13
- ☒ Renungen

Lit perneh sada kejadi, ija sekalak si ipiarana nipe (Python). Nipe e ipiarana kitik denga seh enggo galang. Nipe e enggo ijadikenna desken anggota keluargana. I bas sada wari sengget kel ia, iperdiatekenna nipe e maka beltekna la bagi semalna, kenca iperdiatekenna ras ipereksana maka kepeken enggo itelen nipe e anak si mada nipe e si umurna 6 bulan.

Arah kejadi enda tentuna jadi persinget man banta maka nipe tetap nge biakna bagi nipe amin kuga gia ulina perbahanenta man bana. Bageme biak iblis si tuhu-tuhu petembil ras biak Dibata. Biak iblis kerinana si jahat, kai-kai saja pe siilakokenna eme sin jahat, si mpeturah kiniseran man doni enda ras kerina isina. Biak Dibata kerinana si mehuli, si mpeturah keriahen, kemalemen ate ras kejuah-juahen man doni enda ras kerina isina.

Tangkas kel ituriken Jakob "Adi lit kalak ikenai percuban, ola min nina, "Percuban enda rehna i bas Dibata nari." Sabap Dibata la banci icubai si jahat, janah ise pe labo icubai Dibata." Nulih kita kempak turi-turin bena-benana manusia (Hawa) ndabuh ku bas dosa, teridah ije maka iblis pentar kel i bas ncubai Hawa gelah nimbak perintah Dibata. I bas Kejadin 3:6 ituriken "Itatap diberu e batang kayu ndai, tuhu seh kal akapna jilena, janah buahna pe entabeh nari nge man pangan. lukurina ka, kuga senangna adi arah man buah batang kayu e ndat pemeteh ia. E maka iputikkenna buah kayu e, ipanna, jenari iberekenna man perbulangenna si rassa i je, janah ipan perbulangenna ka." Kerincuhen Hawa nandangi buah batang kayu ras sura-surana gelah ntaken pemeteh kerna si bujur ras sijahat bali ras Dibata.

Enda me si erbahanca ia ndabuh ku bas dosa. Bagi nina Jakob "Tapi kalak kena percuban adi ia tergoda jenari kena siding sura-surana si jahat. Janah adi sura-surana si jahat e ipejangjang, tubuh me dosa. Adi dosa e enggo ilakoken, buahna e me kematen. Ola kam tertipu o senina-senina si kukelengi" (Jak. 1:14-16). Surat Jakob enda isehken rasul Jakob man kerina anak-anak Dibata, khususna kalak Jahudi si enggo Kristen si merap i taneh perlajangen. Perpulungen ngenanami erbage-bage kiniseran erkiteken kinitekenna man Tuhan Jesus. Kata pergegeh isehken rasul Jakob "O senina-seninangku, sangap min iakapndu bandu adi reh erbage-bage percuban ngkenai kami. Sabap ietehndu adi kinitekenndu tetap tahan ngalaken percuban-percuban e, kam jadi kalak megenggeng. Tetaplah kam megenggeng seh kinigenggengenndu serta, maka kam dewasa i bas kai-kai pe, dingen la kekurangan" (Jak. 1:2-4).

Marilah tetap kita megenggeng i bas erkiniteken man Dibata, terlebih-lebih i bas ngalaken pandemi Covid-19 enda. Tek kita maka adi ras Yesus pasti kita ngasup ras iberekenNa serpang puluh. Lawanlah peraten daging ras sura-sura iblis si jahat, segelah la kita ndabuh ku bas percuban ras menang kita naluken si jahat, amin.

5. Ertoto Kenca Renungen

6. Rende KEE 342:1,4

Yesus Lape-lape Tendingku

1. Yesus lape-lape tendingku. Ia njagai kita
Mberat pe si man tangkelenta. Ia njagai kita.
Reff. Tuhan njagai kita. Paksa senang tah mesera
Ia njagai kita. Tuhan njagai kita
4. Adina reh kenca percuban. Tuhan njagai kita
Amin gia taneh meturban. Tuhan njagai kita.
Reff. Tuhan njagai kita. Paksa senang tah mesera
Ia njagai kita. Tuhan njagai kita

7. Pertoton Syafaat

8. Rende KEE 222:1,2

Di Reh Kenca Percuban

1. 'Di reh kenca percuban. Tuhan Yesus si ngk'linisa
Tambah tindih kinis'ran. Minter pindo gegeh baNa.
Reff. Tuhan Yesus si ngk'linisa. Bas kerina dampar g'luhta
Minter pindo gegeh baNa. Suhsah entah senang gia.
2. Baban geluh paksa gulut. Tuhan Yesus si ngk'linisa
Gelah ukur ula serbut. Minter pindo gegeh baNa.
Reff. Tuhan Yesus si ngk'linisa. Bas kerina dampar g'luhta
Minter pindo gegeh baNa. Suhsah entah senang gia.

9. Pertoton Tuhan

Tuhan Yesus Memberkati

